

Comienzo exitoso di Songfestival Antillano

Numeroso publico tabata presente

PALM BEACH, 17 nov. - Despues di varios lunanan di preparacion, e organisadornan di e Songfestival Antillano, diadomingo atardi tabata asina leuw cu nan por a presenta e publico di Aruba e promer rond di e festival. Varios artistanan diadomingo a muestra nan calidad den cantamento, competiendo asina pa e titulo di e mihor cantante di e Songfestival. Publico cu a presencia e programa a ricibi loke nan a spera. Un programa alegre cu bon musica presenta na e mihor manera pa cada participante.

Mas o menos cuatro cien persona a logra hanja un bon lugar den Klompen Klub y Papiamento Room di Aruba Caribbean Hotel diadomingo atardi pa presencia e promer rond di e Songfestival. Varios persona mester a bolbe cas como cu nan tabata laat pa hanja un bon lugar pa presencia e show. E sala di Klompen - Klub y Papiamento Room tabata completamente yen, asina leuw cu e show por a worde presentia bon.

E ceremonia di apertura tabata acargo di Vivon en Chantant, e conocido coro Mixto di nos isla, bao di direccion di señor A. Schermer, kende ta tambe un di e miembronan di hurado di e Festival. Cu e "Himno di Aruba", canta na e conocido manera fan-

tastico di e coro, nan a habri di Songfestival.

Maestro di ceremonia Janchi Tromp, despues a presenta presidente organisativo di e Songfestival, señor Robby Schouten, un hoben cudianan, simannan largo a dedica su tempo pa organisa e festival.

Señor Schouten den su discurso a gradici esnan cu a coopera tanto posibel pa por haci Son tanto posibel pa por haci e Song festival un realidad. Entre otro el a gradici e directiva di Aruba Caribbean Hotel, e emisoran y otro medionan di publicidad, e comerciantenan y publico cu a asisti den gran numero na e promer rond di e Festival pa nan cooperacion. E hurado el a desea un exito y hopi suerte cu nan tarea difícil.

Despues di e palabranan di señor Schouten, a sigui un desfile di e gruponan cu nan cantante, kendenan lo participa na e Songfestival. En total binti seis grupo a tuma lugar na e desfile, di cual varios otronan tabata ausente pa un of otro motibo. Unabez cu e ultimo grupo a worde presenta, e promer serie di cantantenan a cuminsa e competencia di e Songfestival. Esnan cu a tuma parti diadomingo tabata Etty Toppenberg, Glenda - Diaz, Theolindo Lopez, Anna Lillian Kock, y Ray Anthony Thomas, y e cantante di Beatniks. Como estrellanan huesped a actua den e show señora Rhoda Frigerio, kende den un estilo mo-

derno e biaha aki seguramente a cosecha gran exito serca e publico. Padu del Caribe y su piano tambe a duna un cooperacion y show magnifico. E tapdancer Tony Hassel, door di mal coordinacion di su tapnan y e musica di drum acompañante no tabata un estrella brillante como gueststar.

Despues cu e participantenan a canta nan cantica, hurado a cuminsa cu e tarea di eligi e ganadornan. E hurado di e Songfestival ta consisti di como presidente di hurado, señor Emelindo Leonor (pianista di profesion), señor A. Schermer (dirigente di coro Vivonsen Chantant, maestro di school di musica na Aruba), dr. Chan, compositor y gran musico, señor M. Bislick (musico cu propio conunto), señor D. Lacle (conocido pianista di musicanan clasico), señor G. Fasola (dirigente di orkestra di Aruba Caribbean Hotel), señor A. Thompson (dirigente di coro na Lago Colony y maestra di musica), señora B. Strijland, Alavez tabatin seis hurado invitado kendenan ta extranheronan bishitante di e isla. E hurado aki pues a eligi na promer lugar Ray Anthony Thomas di e isla. E hurado aki pues a eligi



Como promer ganador den e Songfestival di Diadomingo, hurado a escohe Ray Anthony Thomas cu su cancion "Around the World".



Numero dos a sali diadomingo atardi, Etty Toppenberg cu e cancion "Adonde Vas Niño".



Anna Lillian Kock tambe a clasifica su mes pa e final, cu su cancion "Cinco minutos para las doce".

lugar Ray Anthony Thomas cu su cancion "Around the World" na di dos lugar Etty Toppenberg cu e cancion "Adonde Vas Niño", y na di tres lugar Ana Lillian Kock cu e cancion "Cinco minutos para las doce". E publico cual a goza tremendo di e show aki tabata pidi pa "mas" pero e ora a pasa asina cu e show a termina. E tres ganadornan aki lo competi den e final cu otro seis ganadornan cu lo worde eligi den e show di otro siman y esun siguiente.

En corto nos por comenta ariba e show aki cu esun di diadomingo ultimo como e promer rond di e festival tabata un exito. Apesar di algun errornan organisativo, nos por bisa cu e organisadornan, kendenan no ta mas cu algun persona a haci un trabao cu merece elogio. Lastima cu e elogio y apoyo moralmente y na otro manera cu nan mester a hanja di e personan di kende ta nan deber pa haci esaki no a worde duna. Hopi biaha nos ta tende cierto grupo di personanan ta reclama cu e hobenan di Aruba tin poco propio iniciativa, nos isla falta di hendenan cu curashi y animo pa organisa of construi algo. En berdad ta sina, pero esaki no pa falta di e hobenan, pero pa falta di esnan cu tin di duna nan e apoyo, esta e "push", cu lo duna nan mas animo. E Songfestival ta un ehemplo claro di esaki.

Hobenan ta muestra nan animo y interes y fantasia pa haci algo pa bienestar di Aruba y nan ta worde laga na calla pa e personanan di kende por worde spera cu nan lo apoya nan. Pues un Songfestival ta algo cu ta progresa e cultura di un pais, door cu e ta progresa e esfuerso di hobenan den arte. Pero sin embargo e organisadornan a muestra loke nan por y e publico di Aruba a aprecia esey. Otro siman diadomingo lo tin e siguiente rond di e Songfestival tambe na Aruba Caribbean Hotel.